

# SOSTEN

Revista pa Kasánan di Ansiano — Union Karibe Hulandes— Aña 2022



**MANEHÁ SU KAS BON**

# SOSTEN



Ta un revista di Departamentu di Hende Muhé Ministerial, trahá espesialmente pa alimentá i fortalesé i enkurashá tur Kasá di Ansiano pa sigui ta un sosten pa nan kasá i pa nan otro koleganan den ministerio.

Konsiente ku Señor ta tur kos pa nan. Ku orashon ta mantené nan. Sin ripará na ken, nan lo traha inkansabelmente ku alegría, sabiendo ku eternidat ta nan deskanso i nan ta duna tur honor i gloria na Dios.

## KONTENIDO:

- 😊 **Kada Hogar Ta Un Iglesia**
- 😊 **Un Tata Pa Ta Orguyoso Di Dje**
- 😊 **Dios Ta Den E Kamber**
- 😊 **Ta Ken Su Falta?**
- 😊 **Trabou di Hende Muhé**
- 😊 **Kon Hasi Iglesia Agradabel Pa Famianan**
- 😊 **Poema: “*Señor, Wak Nos Famia Dilanti Bo...*”**

**NOTA:** Tur artíkulo sin nòmber ta kontribushon di e editor.



Restorashon i elevashon di humanidat ta kuminsá den e hogar. E trabou di mayornan ta sobresalí riba tur otro. Sosiedat ta konsistí di famianan, i e ta loke kabesnan di kas hasié. “*Warda bo kurason riba tur kos, pasobra e ta e fuente di bida*” (Proverbionan 4:23, BS); i kurason di e komunidad, di iglesia, i di e nashon ta e hogar. Bienestar di sosiedat, éksito di iglesia, prosperidat di e nashon, tur ta dependé di influensianan di e HOGAR.

Mayornan por pone pa nan yunan fundeshi pa un bida saludabel i felis. Nan por laga nan bai for di nan kasnan ku vigor moral pa resistí tentashon, i kurashi i forsa pa lucha eksitosamente ku problemanan di bida. Nan por inspirá den nan e propósito i desaroyá e poder pa hasi nan bida un honor na Dios i un bendishon pa mundu.

“Bida ta un skol di entrenamentu for di kua mayornan i yunan mester gradua pa e skol mas haltu den e manshonnán di Dios.” MH 348

Ku Señor por bendishoná nos hogarnan!

Kariñosamente,

*Anna María Manuela Croes*



**KADA HOGAR TA**



**UN IGLESIA**

## Mayornan Mester ta Dios su Representante

Kada famia den e hogar mester ta un iglesia, un bunita símbolo di Dios Su iglesia den shelu. Si mayornan realisá nan responsabilidad pa ku nan yunan, bou di ningun sirkunstansia nan lo no zundra i pèrdè pasenshi ku nan. Esaki no ta e sorto di edukashon ku niun mucha mester haña. Hopi mucha a siña piki fout, pèrdè pasenshi, zundra, i ta muchanan di beis, pasobra a laga nan hasi esei na nan kas. Mayornan mester konsiderá ku nan ta na lugá di Dios pa nan yunan, pa enkurashá kada prinsipio korekto i tene abou kada pensamentu ku ta robes (Karta 104, 1897). Si mayornan i maestronan neglighá e kualidatnan moral di mucha, por ta sigur ku nan lo keda korompí. (Review and Herald, march 30, 1897).

## Religion di Beibel ta e Úniko Protekshon

Generalmente papiando, hóbennan tin poko forsa moral. Esaki ta pasobra a deskuidá edukashon den nan infansia. No mester mira un konosementu di e karakter di Dios i nos obligashon pa kunE komo algu di poko importansia. Religion di Beibel ta e úniko protekshon pa esnan yòn. (5T 24)

Felis ta e mayornan ku nan bida ta un refleho berdadero di loke ta divino, di tal forma ku e promesanan i mandatonan di Dios ta spièrta den e mucha gratitut i reverensia; e mayornan ku nan ternura i hustisia i pasenshi ta interpretá na e mucha e amor i hustisia i pasenshi di Dios; i ku, dor di siña e mucha pa stima i konfia i obedesé nan, ta siñando e mucha pa stima i konfia i obedesé su Tata ku ta den shelu. Mayornan ku pasa un regalú asina pa e yu a bendishon'é ku un tesoro muchu mas presioso ku e rikesa di tur edatnan— un tesoro ku ta dura mes largu ku eternidat. (PK 245)



## Profeshon ta Sin Balor Sin Religion di Kas

E aktonan diario di bida ta revelá e midí i malchi di nos inklinashon i karakter. Kaminda falta religion den e hogar, ta inútil pa nos bisa ku nos tin fe. E ora ei no laga ningun palabra

brutu sali for di lepnan di esnan ku ta forma parti di sírkulo di e hogar ei. Hasi e ambiente dushi ku konsiderashon tierno pa otronan. Lo drenta shelu solamente esnan ku den tempu di probashon a forma un karakter ku ta revelá un influensia divino. Esun ku ke ta santu den shelu mester ta santu promé riba tera. (*Signs of the Times*, novèmber 14, 1892)

Loke hasi e karakter bunita den e hogar ta loke lo hasié bunita den e manshonnán selestial. Alkanse di bo kristianismo ta keda midí dor di karakter di bo bida den e hogar. Kristu Su gracia ta yuda hasi e hogar un lugá agradabel, yen di pas i deskanso. A ménos ku bo tin Spiritu di Kristu, bo no ta di djE i nunca lo bo mira e santunan redemí den Su reino, ku mester ta un kunE den e shelu di felisidat. Dios ke pa bo konsagrá bo mes kompletamente na djE i representá Su karakter den e sírkulo di bo hogar. (*Child Guidance*, 481.2)

E trabou di santifikashon ta kuminsá den e hogar. Esnan ku ta kristian den e hogar lo ta kristian na misa i den mundu. Tin hopi ku no ta krese den gracia pasobra nan ta faya den kultivá religion den e hogar. (*Signs of the Times*, febrüari 17, 1904).

## Mayornan komo Edukadó den Iglesia di e Hogar

Mi ta papia na tatanan i mamanan: Boso por ta edukadó den boso iglesia di kas; boso por ta agencia mishonero spiritual. Laga tatanan i mamanan sinti e nesesidat di ta mishoneronan den e hogar, pa tene atmósfera di e hogar liber di influensia di palabranan desagradabel i sin pasenshi, pa hasi e skol den e hogar un lugá kaminda angelnan di Dios lo bini i bendishoná i duna éksito na esfuersonan ku ta hasi pa esei. (CG 481.4)

Konsiderá e institushon di famia manera un skol preparatorio, preparatorio pa kumpli ku debènan religioso. Boso yunan mester aktua un parti den kapasidat di iglesia, mester mantené kada poder di e mente i kada kapasidat físiko fuerte i aktivo pa e servisio di Kristu. Mester siña nan

nan stima e bèrdat pasobra e ta bèrdat; nan mester keda santifiká dor di e bèrdat, pa nan por para den e gran revishon ku lo bin pronto pa determiná si kada un ta pas pa drenta den e skol mas haltu i bira un miembro di e famia real, un yu di e Rei selestial. (CG 482.1)

### **Nan Mester Biba Un Bida Konsistente**

Tur kos ta laga su impreshon riba mente di e mucha. E ta studia ekspreshon di e kara, e stèm tin su influensia, i nan ta imitá e komportashon djaserka. Tatanan i mamanan sin pasenshi i krepchi ta duna nan yunan lèsnan ku na algun momentu den nan bida nan lo pasa pa henter mundu, si tabata di nan, nan por stòp di hasié. Muchanan mester mira den bida di nan mayornan e konsistensia ei ku ta di akuerdo ku nan fe. Dor di biba un bida konsistente i dor di ehersé dominio-propio, mayornan por moldia karakter di nan yunan. (CG 482.2)

### **Entrená Muchanan Pa Traha Pa Kristu**

Esnan ku ta uní dor di lasonan di naturalesa tin influensia mas fuerte riba otro. Miembronan di e famia mester mustra kariño i amor tierno. E palabranan ku ta papia i e aktonan ku ta hasi mester ta di akuerdo ku prinsipionan kristian. Di e forma aki e hogar por ta un skol, kaminda ta entrená muchanan pa traha pa Kristu (CG 482.3)

Mester konsiderá e hogar komo un lugá santu.... Kada dia di nos bida nos mester so-meté nos mes na Dios. Asina nos por haña yudansa speshal i gana viktorianan diario. Mester karga e krus tur dia. Mester vigilá kada palabra, pasobra nos ta responsabel dilanti Dios pa representá den nos bida te kaminda ta posibel e karakter di Kristu. (CG 483.1)

### **Un Fout Fatal Ku Hopi Ta Hasi.**

Nos por eduká nos yunan hòmbèr i yunan muhé pa un bida di sumishon respetá, un bida aparentemente kristian, pero ku falta Su sakri-fisio-propio, un bida di kua veredikto di Esun ku ta e bèrdat mester ta, “Mi no konosé bo”? Míles ta hasiendo esaki. Nan ta pensa di sigurá pa nan yunan e benefisionan di e evangelio miéntras nan ta nenga su spiritu. Pero no por ta asina. Esnan ku rechasá privilegio di kompañerismo ku Kristu den servisio ta rechasá e úniko entrenamentu ku lo yuda nan pas pa partisipá kunE den Su gloria. Nan ta rechasá e entrenamentu ku den e bida aki ta duna fortaleza i noblesa di karakter. Hopi tata i mama, ku ta nenga nan yunan na e krus di Kristu, a bin siña muchu lat ku di e forma ei nan

tabata duna nan over na e enemigu di Dios i hende. Nan a seya nan ruina, no solamente pa futuro, pero tambe pa e bida presente. Tentashon a vense nan. Nan a krese i a bira un maldishon pa mundu, un ferdrit i bèrgwensa pa esnan ku a duna nan bida. (CG 483.2)

Nos no sabi den ki aria lo yama nos yunan pa nan bai sirbi. Nan por pasa nan tempu den sírkulo di e hogar mes; nan por partisipá den karanan komun di bida òf bai komo maestronan di e evangelio na paisnan pagano; pero di tur forma ta yama tur pa nan ta mishoneronan pa Dios, ministernan di misericòrdia na e mundu. Nan mester haña un edukashon ku lo yuda nan para banda di Kristu den servisio apnegá. (CG 483.3)

### **Siña Nan Dependé Riba Yudansa Divino.**

Si boso ke pa boso yunan tin kapasidat grandi pa hasi loke ta bon, siña nan pa gara e mundu futuro den forma korekto. Si siña nan pa dependé riba yudansa divino na momentu di problema i peliger, nan lo no falta poder pa kontrolá pashon i pa dominá e tentashon den nan pa hasi loke ta malu. Konekshon ku e Fuente di sabiduria lo duna klaridat i poder di discernimentu entre loke ta bon i loke ta malu. Esnan kapasidat di e forma ei lo bira moralmente i intelektualmente fuerte i lo tin bista mas kla i mihó huisio asta den asuntunan temporal. (CG 484.1)

### **Salbashon Sigurá dor di Fe i Konfiansa.**

## **Nos por tin e salvashon di Dios den nos famianan; pero nos mester kere pe, biba pe, i tin un fe i konfiansa konstante den Dios...**

Restrikshon ku Palabra di Dios ta pone riba nos ta pa nos mes interes. E ta oumentá felisidat di nos famianan, i pa tur esnan rònt di nos. E ta refiná nos gusto, e ta santifiká nos huisio, i ta trese pas di mente, i na final, bida eterno.... Angelnan ku ta ministrá lo keda den nos lugá di biba, i ku goso nan lo hiba shelu notisia di nos avanse den e bida divino, i e angel ku ta tuma nota lo skirbi esaki ku alegria i goso. (CG 484.2)

E Spiritu di Kristu lo ta un presensia konstante den nos hogar. Si hende hòmbèr i muhé ke habri nan kurason pa e influensia divino di bèrdat i amor, e prinsipionan aki lo brota atrobe manera fuentenan den desierto, refreskando tur ku ta rònt di nan i ta pone freskura aparesé kaminda awor ta seku i tin skarsedat. (CG 484.3)

Boso yunan lo hiba for di boso kas e influensia presioso di edukashon di e hogar. Traha anto den sírkulo di e hogar, den e promé añanan di e mucha su bida, i nan lo karga boso influensia bai kuné na skol; i hopi otronan mas lo sinti e influensia ei. Asina Dios lo keda glorifiká. (CG 484.4)

### **Edat No Ta Importante.**

A puntra un religioso destaká un biaha kon bieu un mucha mester ta promé ku por karga speransa ku e por ta un kristian. “Edat tin nada di hasi ku esaki,” tabata e kontesta kla. “Amor pa Hesus, konfiansa, kalma, tur ta kualidatnan ku ta pas ku e mucha su naturalesa.



### **Kon Tempran Muchanan Por Bira Kristian?**

Den infansia e mente ta keda impreshoná i moldiá lihé, i ta e ora ei mester siña muchanan hòmbler i muhé pa stima i honra Dios. (CG 486.1)

Dios ke pa tur mucha di edat tierno ta Su yu, pa keda adoptá den Su famia. Pa chikí ku nan por ta, e muchanan por ta miembro di e kas di fe i di tin un eksperensia hopi presioso. Nan por tin kurasonnan ku ta tierno i kla pa risibí impreshonnan ku lo ta duradero. Nan kurason por keda atraé ku konfiansa i amor pa Hesus, i biba pa e Salvador. Kristu lo hasi nan mishoneronan chikitu. Henter e koriente di nan pensamentu por keda kambiá, asina piká no ta parse nada agradabel pa gosa di dje, pero e ta algu pa evitá i odia.

Tan pronto un mucha por stima i konfia su mama, e ora ei e por stima i konfia Hesus komo e Amigu di su mama. Hesus lo ta nan Amigu, stimá i honrá.” (CG 486.3)

Mirando bèrdat di e sita ei, mayornan por ta demasiado kuidadoso pa presentá regla i ehèmpel dilanti e wowonan i sentidonan skèrpi ei ku ta wak nan? Mester hasi nos religion práktiko. Mester di dje den nos hogarnan i tambe den e kas di adorashon. No mester tin nada friu, severo, i prohibí den nos komportashon; pero nos mester demostrá dor di kariño i simpatia, ku nos tin kurasonnan kaluroso i amoroso. Hesus mester ta e Wéspet di honor den sírkulo di e famia. Nos mester papia kunE, trese tur nos preokupashonnan pE, i papia di Su amor, Su grasia i perfekshon di su karakter. Ki lès mayornan deboto por siña, ora nan hiba tur nan problemanan pa Hesus, e Kargadó di Karga, na lugá di kunsumí, pèrdè

pasenshi i zundra pa preokupashonnan ku nan no por yuda kune. Por siña mente di e muchanan chikí pa bira na Hesus meskos ku e flor ta bira su pétalonan ku ta habri den direkshon di solo. (CG 486.4)

### **Mester Siña Dios su Amor den Kada Lès**

E promé lès ku mester siña mucha ta ku Dios ta su Tata. Mester duna nan e lès aki ora nan ta hopi chikí. Mayornan mester realisá ku nan ta responsabel dilanti Dios pa laga nan yunan sera konosí ku nan Tata na shelu.... Kada lès mester siña ku Dios ta amor. (CG 487.1)

Tatanan i mamanan mester siña e mucha i hóbenan di e amor di Hesus. Laga e promé palabranan ku e beibi siña papia ta di Kristu. (CG 487.2)

Kristu mester ta asosiá ku tur e lèsnan ku ta duna na muchanan. (CG 487.3)

For di hopi chikí mester laga nan sera konosí ku e kosnan di Dios. Ku palabra simpel laga e mama kont'é di Kristu Su bida riba tera. I mas ku esaki, lag'é praktiká den su bida diario e siñansanan di e Salvador. Lag'é mustra na su yu, dor di su mes ehèmpel, ku e bida aki ta un preparashon pa e bida benidero, un periodo ku a duna na hende pa nan forma karakternan ku por gana pa nan entrada den e stat di Dios. (CG 487.4)

### **Nan Mester di Mas ku Atenshon Kasual.**

Tur huntu tabatin demasiado tiki atenshon dediká na nos muchanan i hóbenan, i nan a faya di desaroyá manera mester ta den e bida kristian, pasobra e miembronan di iglesia no a wak nan ku ternura i simpatia, ku deseo pa nan por avansá den e bida divino. (CG 488.1)

Señor no ta keda glorifiká ora ku ta negligishá muchanan i no ta hasi kaso di nan. Nan mester di mas ku un opservashon casual, mas ku un palabra di enkurashamentu. Nan mester di un labor kuidadoso, ku orashon. E kurason ku ta yen di amor i simpatia lo yega na kurason di esnan ku ta yòn ku aparentemente ta parse negligente, ku no tin kunen i ta sin speransa. (CG 488.2)

### **Hesus ta Bisa, “Trein e Muchanan aki pa Mi.”**

Mayornan mester buska pa komprondé e echo ku nan mester trein nan muchanan pa e kortenan di Dios. Ora konfia nan ku mucha, ta komo si fuera Kristu ta pone nan den nan brasa

i ta bisa, “Trein nan pa Mi, pa nan por bria den e kortenan di Dios.” Un di e promé zonidonan ku mester atraé nan atenshon mester ta e nòmber di Hesus, i for di hopi chikí mester siña nan resa. Nan mente mester keda yen ku historianan di e bida di Señor, i nan imaginashon enkurashá pa imaginá glorianan di e mundu pa bini. (CG 488.3)...

### **Testimonio di un Mucha ku a Kombertí.**

Religion ta yuda muchanan studia mas mihó i hasi mas trabou fiel. Un mucha muhé di djesdos aña a kontá, den un forma simpel, e muestra ku e tabata un kristian. “Mi no tabata gusta siña, sino hunga. Mi tabata floho na skol i hopi biaha mi tabata pèrdè mi lèsnan. Awor mi ta siña kada lès bon, pa agradá Dios. Mi tabata hasi kos di mala mucha na skol, ora ku e maestra no tabata wak mi, mi tabata hasi ko'i kèns pa e muchanan wak. Awor mi ke agradá Dios dor di komportá bon i obedesé reglanan di skol. Mi tabata egoista na kas, mi no tabata gusta hasi rospondi, i mi ta trèk kara ora mama yama mi for di hunga pa bin yud'é ku trabou. Awor ta un goso di bèrdat pa yuda mama tur manera ku mi por i mustr'é ku mi ta stim'é” (CG 490.2)...




### **Dirèkt for di Infansia pa Hóben**


Permití un mucha sigui su impulsanan natural ta pa permitié deteriorá i bira eksperto den maldat. Resultado di mal entrenamentu ta bisto den niñes. Segun e ta krese un temperamento egoista ta krese tambe den dje, i segun e hóben krese bira adulto, e ta krese den piká. Un testimonio konstantemente kontra negligensia di mayornan ta keda presentá dor di muchanan ku nan a laga pa nan kuenta.

Un kurso asina di dekadensia por keda prevení solamente dor di rondoná nan ku influensianan ku lo kontradesí maldat. For di infansia pa hubentut i for di hubentut pa adulto, un mucha mester ta bou di influensianan pa bon. (CG 491.2)





**UN TATA PA TA**



**ORGUYOSO DI DJE**

“Mayornan ta orguyo di nan yunan”<sup>1</sup>  
([Proverbionan 17:6](#)).

TEMPU MI TABATA UN MUCHA HÒMBER, MI TABATA SINTI GRAN GOSO PA KRESE KU UN TATA DIGNO DI IMITÁ. Mi tata tabata traha den maneho na un utilidat públiko i regularmente e tabata yuda algun di nos amigunan haña trabou einan den verano. Ora un amiga di mi a haña trabou, tur hende tabata puntr’é si el a topa e “hòmber grandi” ainda— nan tabata referí no na su tamaño pero na e echo ku e tabata manehá henter e ofisina.

“No,” el a bisa, “mi’n ta kere esei.”

“E lo sosodé,” nan a bis’é, “pero no preokupá, nan a bis’é, e ta un hopi bon hende.”

Ora e momentu a yega pa e gran introdukshon, mi amiga a hari segun el a realisá ku el a topa e “hòmber grandi”— i mi tata a dun’é un brasa. Ora el a konta mi di e insidente, mi’n por konta bo kon orguyoso mi a sinti ku otronan ta wak ku apresio i rèspèt na mi tata, manera ami ta hasi. Mi tabata sa ku mi tata no ta laga nos famia su kara na bèrgwensa. E tabatin un trabou respetá. I e tabata un hòmber di karakter i di integridat. Mi tabata sinti orguyoso pa ta su yu hòmber.

Parti di disiplina di paternidat ta pa ta un persona ku mi yunan por sinti orguyoso di dje. *Mi* reputashon lo afektá esun di nan; mi no ke pa nan mester sinti bèrgwensa pa “atmití” ku, sí, nan ta famia di mi. Mi a invitá algun hende klave pa tene mi responsabel pa e rason aki mes. Mi no ke hasi nada ku ta pone mi yunan sinti bèrgwensa. Mi sabi ku hende su kurason ta engañoso, mi ke otro hende hòmbènan spièrtá mi ora mi ta halando muchu serka di fronteranan.

Lukas ta bisa nos ku Elisabèt, e mama di Huan Boutista, a hala Dios Su atenshon pasobra e “tabata hustu den bista di Dios i tabata kana ireprochabel den tur e mandamentunan i ordenansanan di Señor” (Lukas 1:6). Meskos ku Elisabèt nos por konsagrá nos mes pa e propósito di kria un di esnan ku ta karga Dios Su imágen. Andrew Murray ta reflekshoná i bisa, “Kada mama na estado mester ofresé su kurpa komo un tèmpel di Spiritu Santu, asina komienso mes di e bida den dje por keda sombrá dor di Spiritu Santu.”

E konsagrashon aki ta un proseso kontinu. En realidat, e ta un ehersisio hopi saludabel pa un mama òf tata puntra, “Ta kiko mi yu hòmber òf yu muhé lo pensa si nan sa ku mi ta hasiendo esaki?” Tin hopi rason pa buska santidat, pero pa kria yunan ta siguramente un di esnan mas importante. Asina hopi biaha, nos komo mayornan, ta asina konsentrá pa nos yunan “evitá problema” ku nos ta lubidá ku *nos tambe* por *haña nos mes* den mes tantu problema. Nos tur— tantu esnan yòn i esnan bieu— ta apelá na nos pa ofresé nos kurpanan komo tèmpel di Spiritu Santu.

Muchanan ta deseá mayornan ku nan por ta orguyoso di dje. Un tata ku yama Florescu a wòrdu torturá ku staka i kuchuw kayente kayente. Ora ku e tortura no a kibra e spiritu di Florescu, e Komunistanan a pone djakanan mort’i hamber den su sèl dor di un tubu largu, ku tabata nifiká ku Florescu nunca por a haña suficiente soño. Tan pronto e kuminsá kabishá, e tabata wòrdu komé literalmente, asina e mester a keda lantá pa defendé su mes. Esaki a sigui asina pa djeskuater dia largu, pero ainda Florescu tabata nenga di duna nòmber di otro kristiannan den su grupo.

Despues e Komunistanan a trese Florescu su yu hòmber di djeskuater aña i nan a kuminsá sut’é dilanti di su tata. Segun e mucha tabata grita di doló, e Komunistanan tabata tèr Florescu, i ta bis’é ku nan lo sigui bati su yu te ora e bisa nan loke nan ke sa.

Finalmente, Florescu tabatin basta. “Alexander!” el a bisa duru. “Mi mester bisa loke nan ke. Mi no por soportá bo sutamente mas!”

Sorprendentemente, Alexander yòn a kontestá ku un súprika ainda mas apashoná: “Tata, no hasi mi e inhustisia di tin un traidor komo tata. Resistí! Si nan mata mi mes, lo mi muri ku e palabranan, ‘Hesus i mi patria.’”

Florescu nunca a lubidá e palabranan di su yu hòmber: “Tata, no hasi mi e inhustisia di tin un traidor komo tata.” Pa Florescu su yu hòmber, pa tin un tata ku e por ta orguyoso di dje tabata muchu mas importante ku su mes bida.

Kisas ta pa e motibu ei Hosue su promé palabranan tabata “i pa loke ta ami i mi kas, nos lo sirbi Señor” (Hosue 24:15), ta kuminsá ku *ami*. Promé ku esnan den mi kas sirbi Dios, mi ta dediká mi mes na sirbiÉ.” Pa loke ta *ami* i mi kas...”

Ami no ke un yu traidor, pero ainda mas, mi yu no ta deseá un tata traidor.

*Tata na Shelu, bo ta un Dios ku nos ta honra i ta orguyoso di adorá. Yuda nos ta mayornan ku nos yunan por respetá i admirá. Gana e bataya pa nos kurason i mente asina nos por biba komo ehèmpelnan positivo pa e yunan ku bo a pone bou di nos kuido. Den nòmber di Hesus, Amèn.*

---

<sup>1</sup> [Devotions for Sacred Parenting on Apple Books](#)



**DIOS**

**TADENE**

**KAMBER**



“Unda mi por hui for di bo spiritu,  
Unda mi por skapa fo'i bo bista?  
Ku mi subi bai shelu, Bo t'ei.  
Ku mi drumi band'i mortonan, Bo t'ei.  
Ku mi bula riba ala di ourora baha “  
na kosta di mas leu di laman:  
Aya tambe bo man lo guia mi,  
bo man drechi, sigur, lo tene mi.”  
(Psalm 139:7-10)

MI TIN GANA DI SUGERÍ UN LEMA  
PA BIDA DI FAMILIA KRISTIAN: “Dios  
ta den e kamer.”

Miéntras ku Dios *semper* t'ei, asina  
hopi biaha nos ta aktua i pensa i  
komportá i papia komo si fuera no ta  
asina. Nos ta pleita, nos ta diskutí, nos  
ta hari; nos ta hunga weganan, nos ta  
wak pelikula, nos ta frei otro, i ta hasi  
tur kos sin ni sikiera pensa riba e  
realidat ku *Dios ta den e kamer*.

Ounke nos ta resa promé ku nos kome, e ta  
asombrá mi kon lihé nos por slep bai bèk den  
pensa i aktua komo si fuera e palabra *Amèn* ta un  
tipo di kòrtina ku nos ta trèk hala abou dilanti  
shelu. Mi a bisa mi parti obligatorio, i awor mi por  
dal bai meskos ku Dios a pasa nos kas bai na  
lugá di hasi Su bibá meimei di nos.

Pensa kon diferente nos lo trata nos yunan na  
e momentunan di frustrashon si nos respondé nan  
ku e konosementu ku Dios ta den e kamer. Si di  
bèrdat nos ta kere ku E, Dios, ku a diseñá nan i ta  
apashoná pa nan bienestar *tabata* literalmente  
mirando over di nos skouder, nos lo tin un poko  
mas pasenshi, un tiki mas komprondementu?

Nos lo disipliná nos yunan un tiki mas  
diferente? Nos lo pone mas atenshon na nan?

E ta un noshon asina simpel, pero e por ta  
asina revolushonario: *Dios ta den e kamer!*

Ami no sa di bo, mi ta duda seriamente ku lo mi  
hisa mi stèm, òf lo ta asina egoista òf floho si mi  
por a mira Dios sintá den mi kushina òf den mi  
sala. Ariba tur kos, lo mi ke pa mi yunan mir'É i  
rekonosÉ, i mi ta kere ku lo mi enfoká mas riba e  
tipo di kriansa ku E lo keda kontentu kuné na  
kualke momentu. Lo mi bira wak E pa enkura-  
shamentu ora parse ku un yu ta desanimá. Lo mi  
pidiÉ un konseho ora un yu bin buska mi konseho.

Mi ta kere ku despues di hasi òf bisa algu, lo mi  
drei wak E pa lesa e ekspreshon di Su kara.



Esaki lo ta un bendishon, no un karga, i e ta  
algu ku nos por kuminsá praktiká. Un grupo di  
hende muhé ku mi a hiba charla pa nan, a traha  
algun plakato: “DIOS TA DEN E KAMBER” ku nan  
a bende asina miembronan por pone nan den nan  
kas komo un rekordatorio konstante. Kon kria-  
mentu di yu lo kambia si nos papia komo si fuera  
Dios ta den e kamer? “*Dushi, kon bo ta kere Dios  
ta sinti pa bo aktitut awor aki?*” *Esaki ta agradabel  
p'É?* “*Mi sabi ku bo tin miedu, pero Dios ta  
akinan, den e kas aki. Realmente. I E ta wak riba  
nos tur, asina bo por drumi trankil numa.*

Bis'é na bo mes, kada mainta, kada mèrdia,  
kada atardi: Dios ta den e kamer. Bis'é un na  
otro, kada biaha boso sinti tentashon pa grita, òf  
kritiká, òf ridikulisá, òf asta ignorá otro: Dios ta den  
e kamer. Bis'é na boso yunan, durante henter e  
dia: Dios ta den e kamer. Laga nos sigui bisa nos  
mes i otronan esei te ora ku nos praktik'é i bib'é, i  
hala rosea ku e rekuerdo bendishoná: Dios ta den  
e kamer. *Dios ta den e kamer!*

#### ORASHON:

*Nos Tata na Shelu, pasobra bo ta un Dios di  
amor, nos ta asina bendishoná pa sa ku semper  
bo ta den e kamer. Yuda nos kòrdá bo ku  
kurasonnan di adorashon i ku reverensia apropiá.  
Yuda nos hasi nos yunan tambe konsiente di  
esaki. Den nòmber di Hesus, Amèn.*



TAKEN  
SU FALTA?

A tuma kontakto ku un pareha yòn i a invitá nan pa bin na e servisionan di iglesia. Ata aki e resultado:

E PROMÉ YAMADA:

“Nos ta kuminsá bin ora e beibi ta suficiente grandi pa sali kuné.”

UN AÑA DESPUES:

“Sí, nos a primintí, pero e beibi ta den e etapa ku e ta yora hopi. Mi’n ta saka nada for di e servisionan, i mi sa ku e ta stroba otro hende. Ora e bira mas grandi....”

TRES AÑA DESPUES:

“Mi sa bo ta pensa ku nos ta hende horibel, pero nos no ta bin misa pasobra Julie no ke bin. Di kon bo ta kere e ta diferente for di otro mucha di su edat?”

“DJESUN AÑA DESPUES:

“Mi ta kontentu ku b’a yama. Mi ke pa bo òf un di e ansianonan wak si nan por papia ku Julie. E ta anda den grupo di hendenan robes. Kisas si iglesia proveé algun sorto di entretenimentu pa e hóbennan, e lo por ta interesá.”

DOS AÑA DESPUES:

“Sí, Julie a kasa. Nan tabata hopi yòn, anto e no ta miembro di iglesia, pero nos ta spera ku e lo funshoná.”

DIES AÑA DESPUES:

“Wèl, Julie a kasa finalmente ku un hòmber ku por dun’é e mihó kosnan di bida. Esaki ta su di tres kasá, pero e no tabata por ku e otronan. Mi tabatin speransa ku esun aki lo bira un miembro di iglesia, pero e predikadó a presentá un sermon tokante matrimonio i divorsio, anto el a bisa ku nunca mas e lo bai e misa ei atrobe. Mester tin algu robes ku e misa ei, sino e lo tabatin un mihó influencia riba Julie. Kisas nan tin ku kambia e predikadó. Ami’n sa....”

SEÑOR, T’AMI?



**TRABOU DI  
HENDE MUHE**

RUMANNAN DI KONFERENSIA GENERAL, lo mi mester ta mudo dilanti grandesa di mi tema, i di e trabou ku Señor a duna mi, si no ta pa e echo ku E ta den tur kos. Mi tin mi dilanti un tarea ku lo ta imposibel, si Señor no yuda boso kapta tur loke e tin di bisa dor di mi, pa nos komprondé otro; pero ta hopi nesesario pa nos komprondé otro, pa motibu di e interesnan ku ta na wega.

Awe mainta mi ta sinti Señor ta dirigí mi pa papia di e nesesidat ku tin riba nos komo pueblo; e nesesidat ku tabatin riba iglesia den tur siglo, i ku Señor a pone riba mi mas ku 25-aña pasá, pero ku nunca mi tabata kapas di hasi manera mi ta sinti ku mester hasié. Mi ta kere ku a prepará mi tur e añanan ei pa e oportunitat di awe mainta. Al final Dios a duna mi un oportunitat— i O, kuantu mi ta alab'É pa esei! El a duna mi un oportunitat meimei di un pueblo ku por komprondé e trabou ku a bini riba mi manera un karga insoportabel mas ku 25-aña pasá, i bou di kua mi a lucha, i yora, i a konsagrá mi mes, i a kuminsá *hasi* kosnan ku tabata imposibel, pero ku mester hasi posibel, ku mester hasi práktiko.

Tin un mandato indispensable pa iglesia: pero kiko ta e iglesia? --Un kurpa ku ta konsistí di individuonan. P'esei ta duna e mandato aki na kada individuo. Bai den henter mundu, i prediká e evangelio na tur kriatura. I na unda “tur e kriatura” ei ta? **Na unda por haña tur e kriatura ei?** [Stèmnan a respondé: Den henter mundu.] Si, den henter mundu, pero un otro kaminda mas. Henter mundu ta un lugá hopi GRANDI. [Stèmnan: Band'i nos.] Kon serka? —**Ei mes den nos KAS.** Tur kos ku ta bini den mundu ku tin aber di un forma òf otro ku bida humano mester bini dor di e hogar. Pa esaki no tin niun eksepsion. Tur kos, bon òf malu, ku ta yuda òf ta stroba ta originá den e hogar; kada nesesidat di kada alma humano ta originá den e hogar, i e salbashon di Señor Hesu-Kristu, manera el a keda manifestá riba tera, a originá den e hogar humilde ei na Nazarèt. I den progreso di trabou di e evangelio den mundu a keda demostrá hopi tempu pasá ku e “kada kriatura” no a keda alkansá; tin algu robes un kaminda: un mundu ku ta muriendo den ignoransia, repartiendo un evangelio perfekto, i niun hende ta kapas di deskubrí na unda e falta ta sinta. Tabata band'i trinta aña pasá ku pa promé bes e karga a bira asina intolerabel den kampanan mishonero ku no por a suport'é. Tabatin un poder un kaminda den kada pais pagano ku tabata stroba progreso di e evangelio. Un hòmer por rekonosé bèrdat di e religion nobo; pero strañu ta ku e ta keda strobá di bib'é: i a keda deskubrí ku mester a haña e strobashon aki den e harem i zenana (lugá pa hende muhé den kasnan oriental).

E mama i esposa por ta un katibu: pero e tabatin e poder pa hasi masha difísil pa e hòmbenan den su famia bira kristian. E tabatin poder kapas pa stroba progreso di e evangelio, i hasi trabou di e mishonero, en realidat, hopi difísil....

Manera mi a bisa na prinsipio, tur loke ta bon òf malu mester originá den e HOGAR. Pa algun rason e evangelio no a kana manera e mester a bai. Nos ministernan a konfesá ku tabatin debilidatnan. Parse ku nos rumannan ta manká. Parse ku tin algu ku bo no por mira ariba ariba, pero ku a stroba progreso di e evangelio; i mi ke bisa boso, rumannan, pasobra e kosnan aki, ounke por parse ku e strobashonnan aki ta bini for di mundu, mi kier bisa boso ku si tur kos tabata na òrdu den e HOGARNAN ku ta representá dor di e hendenan aki, e portanan di fièrnu lo no por prevalesé kontra dje. **E strobashonnan ta den e hogar:** i konsiderando e nesesidatnan ku ta urgi nos pa bai dilanti, ta di sumo importansia pa nos hasi suficiente esfuerso ku lo pas pa atendé e nesesidat aki, —pa hasi algu pa asina ei kaba ku e strobashonnan, ku e defektonan ei ku ta den e hogarnan; pa asina e ministerio, nos rumannan ku ta sali bai hasi e trabou, por sali bai sintiendo fuerte, ku kurashi, refreská; pa asina kada hòmer, segun e ta stap pasa over di drèmpel di su kas, i sali bai pa para dilanti e pueblo ku mensahe di e evangelio, e por sa ku tur kos ta na òrdu na su kas, entre su mes yunan, den e atmósfera ku el a laga su tras, i ku e ta karga huntu kuné.

**Si tin algu den e hogar ku kontinuamente ta feila i iritá, si e yunan no ta kresiendo manera mester ta, si asuntunan di kas no ta saturá ku e Spiritu di Dios, si su atmósfera no ta dushi ku fragansia di shelu, —ta kon un hòmer por sali bai i ta fuerte pa proklamá e evangelio di Hesus?**

Si ora e lanta para na plataforma dilanti su pueblo pa prediká na nan, tin algu tras di dje, na su mes kas, ku ta feila, ku ta di preokupashon, i ta hasi su kurason pisá, i ta pone su seleber ta traha konstantemente rònt di un problema doméstiko, ta kon e por presentá e mensahe sagrado, i hasié kla na e pueblo?

Den e tempu kòrtiku for di dia ku e trabou aki a kuminsá, mi tabata tin un revelashon maravioso, dor di e hopi kartanan ku mi ta risibí. A permití mi wak den hogar di e pueblo aki. A habri mi dilanti e lugánan doloroso den kurason di nos Sion; i asina mi a bin kargá awe mainta.



Mi a sinta akinan dor di henter e konferensia, kargá pa e HOGARNAN ku ta nos tras— pa e hendenan ku no ta akinan, kende boso ta representá, ku nos tur ta representá, sperando ku e evangelio aki den algun forma lo hasi su trabou kompleto den sènter mes di e iglesia aki.

E HOGAR ta kurason di e iglesia; i e mama den e hogar ta su sènter di bida. Loke e mama ta, asina e hogar ta; i loke e hogar ta, asina ta e esposo i tata, sea den su fortaleza òf den su debilidad. E no por ta di otro forma. E por ta un hòMBER di propósitonan sinsero i onesto, i ku un kurason tierno. E por anhelá di hasi loke ta bon; pero si e realisá ku tin algu ku e no por kontrolá, òf no por komprondé, den bida di e hogar; si tur kos no ta bayendo suave manera mester ta, si Hesus no ta biba eiden, representá den bida di e mama i esposa den su hogar, e hòMBER ta manká i suak apesar di tur loke e por hasi òf por ta. Dios a habri mi dilanti e nesidadat ku mester hasi un trabou den e hogarnan di esun aki i di tur otro pueblo; i e mester sali for di e hende muhénan di nos pueblo.

**Nos hende muhénan mester por biba e mensahe aki di un evangelio doméstiko**, i mester karg'é for di nos hogarnan pa otro iglesianan, i pa e hogarnan di mundu. Tin hopi hòMBERNAN awendia den bida di negoshi, ku ta bisa ku nan ta inkredulo, kende su kurason a bira for di tur loke ta tierno, ku por hiba nan na algu manera un konfeshon di nan nesidadat, simplemente pasobra nan ta sinti ku esaki ta pornada. I tur esaki pasobra a mira kon diferente ta bida di e hòMBER i muhénan ku ta bisa ku nan ta kristian, di e forma kon nan ta biba dilanti e mundu, den e hogar, i nan a pèrdè fe den su poder. E ta faya den e hogar, i e hende ta bisa, e lugá kaminda mi tin gana di mira Kristu manifestá ta den mi hogar; frakaso tin, frakaso tur kaminda. Hopi hende hòMBER a bisa na mi, si mi por mira kristianismo manifestá den bida di e hogar, asina ku hogar di e minister, hogar di e hòMBER i muhé ku ta bisa ku nan ta kristian, ta den harmonia ku loke nan ta profesá, ami lo ta kontentu pa busk'é i asept'é.

Promé ku hiba e evangelio na kada kriatura, mester tin ekipo di e poder den esnan ku ta para den, i ta sali bai for di sènter di e trabou aki. Lo no dura muchu mas (e tempu ta awor aki mes) promé ku esnan ku ta representá e obra aki lo wòrdu pone den lus skèrpi dilanti e mundu kaminda kada akshon di nan lo konta sea na fabor òf kontra e bèrdat. Kada hende mester por soportá e prueba ora e keda kritiká; ora mundu bira su teleskop riba dje i analis'é, e mester haña e mama komo un berdadero representante di Hesu-kristu; atmósfera di e hogar saturá ku e aroma di shelu i e influensianan plamá tur kaminda dor di e yunan, i tur ku ta

drenta i sali riba drèmpel di e kas, nan bida lo konta pa Kristu.

Atventistanan di Shete Dia ta un pueblo altamente favores'é; i na prinsipio mi a kere ku nan tabata hendenan perfekto. Ku wowonan yen di anhelo mi tabata wak esnan ku a lanta den e gran prinsipionan aki. Mi tabata envidiá nan pa motibu di e punto haltu di privilegio ku nan tabata okupá. Mi a pensa ku kada un lo ta bèrdadero pasobra tabata kosta asina hopi pa bira un Atventista di Shete Dia. E mester saka tur “ami” for di kualke hende. Mi'n tabata mira nada pa guia un hende pa bin meimei di e pueblo aki, eksepto pa un sumishon inkondishonal na bèrdat, un fidelidad na bèrdat ku lo hiba na renunsiá tur loke ta karnal, tur loke no ta di Kristu. Rumannan, mi ta kere ku e punto di bista aki di loke Atventistanan di Shete Dia mester ta, ta presis loke Dios ke pa nan ta. Mi no ta kere ku mi a atribuí nada den liña di perfekshon na e hendenan aki ku no ta intenshon di Dios pa nan alkansá.

For di dia ku mi a bin bira un ku boso, for di dia ku mi a aseptá e reprimendementunan aki komo personal, for di dia ku mi bida i mi kurason a mara huntu ku boso den e lasonan di kompañerismo kristian i labor, mi a bin sinti ku a yama nos tur huntu, ku ta enkurashá nos dor di tur konsiderashon posibel, ariba na e halturanan ei di logro ku ta nifiká perfekshon den Kristu, perfekshon den tur loke ta pertenesé na kresementu i desaroyo di karakter. Mundu tin derecho di yama riba nos pa perfekshon. E tempu ta pronto akinan ora ku e lo no ekskusá imperfekshon den nos; i pa nos por ta kapas di kumpli ku e ekspektashonnan di Dios i di un mundu den pèrdishon, mester hasi un trabou grandi den e hogarnan ei.

**KADA MUCHA TA UN PUBLIKADÓ.** Un famia ku tin yu ta un asosyashon di publikashon. E ta publiká loke supuestamente mester keda sekreto den seno di e famia i bida di e tata i mama. Loke a bin dilanti den kurason sekreto di e mayornan; loke mester keda supuestamente será meimei di e kuater murayanan di kas, ta wòrdu hibá eifó, i publiká riba skinanan di kaya, dor di loke e yunan mes ta.

Dor di nada a tene mi asina okupá for di dia ku mi a bin meimei di e pueblo aki, manera pregunta di tatanan i mamanan ku ta puntra kon nan mester koregí e forma di biba di nan yunan. “Kiko mi por hasi ku mi yu hòMBER?” un tata ta skirbi mi; i despues e ta sigui bisa ku e yu tin 15, 16 aña, i ya kaba el a kuminsá slep bai; e ta riba kaya, el a kuminsá sera amistad ku muchanan di kaya, huma sigaria, papia palabra malu, el a bira inmanehabel. Kiko mester hasi kuné?

“Ta di kon mi yu no ke obedesé mi?” ta e gritu ku ta bini kontinuamente for di tatanan i mamanan. Klaro ta, ku mi no por bai den diskushon di tur e pakiko di tur esaki den detaye; pero lo mi djis indiká loke tin na RAIS di henter e asuntu. Si e no ta apliká personalmente na abo, e ta apliká pa un hende ku bo tin ku alkansá ku e bèrdat: *E yu den e kas tin di atendé ku e tata i e mama i ku e prinsipionan ku nan ta representá, meskos ku boso tambe— e tata i e mama— tin ku atendé ku boso tata Selestial, i ku e prinsipionan ku E ta representá.*

No tin desviashon for di e regla ei. E forma kon bo ta atendé ku bo Tata na Shelu, i ku e prinsipionan ku E ta representá, i ku El a duna, ku El a siña den su palabra, ku el a siña den relashonnan humano, ta determiná e manera ku boso yu lo atendé ku boso i ku mésun prinsipionan ei manera boso ta bisa boso ta representá nan. Mi sabi ku esaki ta un kos duru pa bisa; pero e ta un kos duru pa TA. Un gritu kontinu ta bin dilanti, “Kon nos por salba nos hóbennan!”

Ayera mi a habri un karta den kua un ruman ta skirbi pa un otro hende. Un mama i tata, ku nan kurason kibrá, tabata muchu ferdrit i desanimá pa skirbi mi; i asina e amiga aki a skirbi pa nan, pa konta mi di nan yu hòMBER. E tabata ta un bon mucha kariñoso, atento den e hogar; pero e ta bisa ku un kambio a bini riba dje; e ta bisa ku “pronto e lo tin ku kuminsá wak kon e ta kuida pa su mes, i e no ta mira kon e por hasi esei, i warda e sabat.” Despues e ruman aki ta sklama, “Oh, mi ta asina desanimá! Mi kurason ta asina kibrá. Ta kon nos por preservá nos hóbennan kontra e dia di Señor Su binida!”

Esei ta e gritu. E obligashon ta riba e hendenan aki pa preservá nan yunan te e dia di Señor Su binida. Kon nos lo kontestá pa nos yunan? Si Señor bini i ripará ku nos yunan no ta huntu ku nos, kon nos lo kontestá ora nos nòmber wòrdu yamá den e huisio? Kon nos kaso lo keda si nos no por bisa, “Ata mi aki, i e yunan ku Bo a duna mi?” ...

Si bo lesa den e promé epístola di Juan kapitulo kuater, versíkulo djesshete, lo bo haña esaki: “Manera E ta, asina nos ta den e mundu aki.” **Asina nos ta den e mundu aki ku ningun otro propósito ku pa purba trese bèk na Dios loke Satanas a hòrta for di dje. Kada un mester yuda e otro pa bini bèk serka Dios; pa trese e hogar bèk na e nivel ku el a kuminsá kuné;** pa trese e negoshi di mundu na nivel di e evangelio; pa ta fiel representante di Hesus den kada aria di vida. Nos ta akinan pa e propósito ei, i pa niun otro; i ta intension di Dios pa nos usa tur loke bin

den nos vida— pa atendé e asuntunan di e mundu aki, e kosnan material rònt di nos— simplemente komo oportunidatnan pa manifestá Kristu, pa testifiká p’É dor di poder di Spiritu Santu.

El a pone nos den famianan pa e propósito ei. El a pone hòMBER i muhéNAN huntu, den e relashon di esposo i esposa i mayornan i yunan, pa ilustrá e union ku Spiritu Santu ta duna, pa medio di e pas ku ta mara nan huntu den un relashon hopi íntimo i será, pa asina bira un realidat bibu pa e gloria di Dios. El a pone tatanan, mamanan, i yunan den e relashon será i íntimo ei pa forma e yunan, pa nan desaroyá, keda eduká, edifiká i kapasitá di bai eifó den e mundu i tum’é manera Satanas a kambí’é, den su peor kondishon; i na lugá di keda vensí dor di dje, pa vensé, sumitié, i trese bèk, kada hòMBER, pa e uso di Dios, a lo ménos un sekshon chikí di e mundu (e hogar), redemí for di e maldishon.

Ta su intension espesialmente pa muchanan den hogarnan Atventista di Shete Dia sali bai bistí ku mas poder ku kualke otro mucha den henter mundu por tin. Si muchanan den hogarnan Atventista di Shete Dia no por ta mas fuerte pa resistí impuresa i tentashon, ku kualke otro mucha, e motibu e ora ei ta pasobra tin algu robes den e hogar.

E hogar tabata Dios Su promé institushon. El a kre’é, manera un mashin, pa un trabou espesífiko i definí. El a dun’é su trabou; i pa e trabou ei El a pone un banda sierto kantidat di poder. Tur bon makinista, ora e hasi provishon pa usa poder, lo tuma na konsiderashon tres kos: *e trabou ku e ta bai hasi, e kantidat i ki tipo di trabou e mashin mester hasi, i e kantidat di poder di akuerdo ku e trabou ei.* Despues e ta tuma den konsiderashon e frikshon nesenario ku mester tin den e mashin i pa hasi e trabou; i e ta sòru pa tin suficiente poder, riba i mas di loke ta rekerí pa e trabou, pa vense e frikshon nesenario aki. Despues e ta tene na konsiderashon loke mester keda komo reserva pa supli emergensianan diripiente.

Awor DIOS ta presis e tipo di makinista aki. E trabou ku e hogar mester hasi tabata e produkshon di hòMBER i muhéNAN ku por sali bai den e mundu, i tum’é, manera mi a bisa mas promé, meskos ku nan a hañ’é; i na lugá di keda vensí dor di dje, pa someté i vensé. Nunka tabata intension di Dios pa ningun mucha hòMBER òf mucha muhé sali bai for di un hogar kristian i bai na ruina. Nunka!!! El a hasi provishon pa usa suficiente poder pa e hogar hasi su trabou. Despues El a paga tinu na e frikshon nesenario; el a pisa un herensia malu te na Adam; El a kohé, pis’é i midié. E tabata sabi presis ki parti e tabata bai hunga den vida di e mucha ei; el a kohe e influensianan robes

ku por tin den e medio ambiente, el a tuma na kuenta e temperamentu di e tata i di e mama, i el a tuma na kuenta tambe e bar na skina di kaya, i e kas di piká, i tur e kosnan malu ku Satanas por posibelmente trese riba dje.

Mi no ta kere ku Dios hamas a wòrdu kohe pa sorpresa dor di un kos ku Satanas a yega di hasi. E tabata sa tur kos ku e bar por nifiká pa bo yu hòmber, i kiko tur e mal influensianan di e mundu tabata nifiká pa kada mucha hòmber i mucha muhé den kualke hogar kristian. E tabata sa tur kos di esei; i en bista di tur e kosnan aki, El a tribi bisa un kos na mayornan ku ta yen di inspirashon i kurashi. Den Echon 2 nos ta lesa tokante e maravioso manifestashon di Spiritu Santu ku mester bin riba iglesia— yobida di plenitut di Spiritu Santu: (v.38) “Pedro a kontestá”, ‘Kombertí i laga batisá boso den nòmber di Hesu–Kristu, pa Dios pordoná boso pikánan. I Dios lo duna boso Spiritu Santu. E promesa aki ta pa boso, pa boso yunan, i tambe pa tur esnan ku ta leu, esta tur e hendenan ku Señor nos Dios lo yama.”

**Promesa di Spiritu Santu ta pa boso i pa boso yunan.** Esaki ta indiká den forma kla ku lo tin sufisiente poder pa manehá e mashin aki di e hogar, asina e yunan ku sali for di dje lo ta kapas di aktua komo hòmber i muhénan, pa ta berdadero i konfiabel; ku nan lo por bai den e mundu, i para pa e bèrdat.

Djis imaginá kiko e lo ta pa e mensahe aki si e muchanan den nos hogarnan tur kaminda, segun nan sali bai meimei di nan kompañeronan na skol, i den e trabou di bida, sekundá e mensahe ku nan tata a prediká sabat mainta for di pùlpito; asina ku hende lo bisa, “Mi ta kere den e hòmber ei su predikashi, pasobra mi konosé su yunan;” “Mi ta kere den e muhé ei su testimonio, pasobra mi konosé su hogar, pasobra mi konosé su yunan.” Boso no ta kere ku esaki lo yuda den e trabou di plama e evangelio!

Mi kier bisa boso ku E TA POSIBEL, ASTA AWOR AKI, pa hasi un trabou pa e muchanan ei ku a bai for di e kaminda, ku lo trese nan bèk. Esei ta e kos, rumannan hòmber i muhé, riba kua mi a pone mi kurason. E karga ku ta riba mi alma awe, ta pa rebibá den e hogar di e hendenan aki un poder ku lo trese e yunan bèk pa medio di forsa di amor di e bèrdat— e forsa di Dios ku ta den dje.

**Pero promé ku por hasi esei,  
mester hasi un trabou pa  
i dor di e mama.**

Mi a risibí karta for di mamanan ku tabata na punto di suicidio. Mas ku un mama a skirbi mi, “Bo karta a yega nèt na tempu. Mi tabata asina desanimá.” Mi a risibí karta for di hende muhé ku ya kaba, den nan desanimo a kuminsá slep bai den e bahada ei ku ta hiba na falta di fe i des-honor. Abo i ami kisas no ta komprondé kiko kier men pa keda gará den un neblina asina; pero e echo mes ku kualke pover alma por a keda asina atrapá a spièrta tur e simpatianan di mi kurason. Mi a bisa, añanan pasá, ku ami lo, dor di e grasía di Dios, mantené mi kurason bibu i lihé pa kualke nesesidat asina, i ku lo mi kontestá te kaminda mi abilidad por na e nesesidat ei. Ta p’esei mi ta akinan; i ta p’esei Dios a duna mi e trabou ei,— pasobra E tabata sabi ku mi kurason tabata bibu pa e kosnan aki.

Un kos ta aparente pa mi. Mi tabata buskando un solushon pa e problema di e kondishonnan ei. Kon kosnan asina por t’ei meimei di un pueblo ku prinsipionan asina haltu? Ta e pregunta; i esaki ta e kontesta, manera el a bin na mi: MESKOS KU E KOSNAN DUSHI, ORA NAN BIRA ZÜR, NAN TA BIRA MAS OFENSIVO, ASINA PA BIRA KONTRA E LUS I BÈRDAT DI MAS GRANDI TA PA KAI DEN E SKURIDAT I MALDAT DI MAS GRANDI.

E hendenan aki tabata tin lus maravioso. Dor di tur e añanan aki, trint’i sinku òf kuarenta, lus tabata basha riba e puebel aki; i tòg tin esnan inválido, físiko i moral, meimei di nos. Esaki ta debí na e echo ku nos no a kana den e lus ku Dios a duna nos. A tene e bèrdat den inhustisia, i pa tene kualke bèrdat den inhustisia, ta pa hasié venenu. Esun kos ku ta nos dilanti komo pueblo ta pa mira tur kos stret den kara, den e lus kla ku Dios a duna nos, i trata di prepará pa atendé kada emergensia i kada nesesidat, asina nos por ta kla pa sali bai den e kunuku, i hasi e trabou ku ta pertenesé na nos pa nos hasi.

Buska Señor, boso tur su ministernan!

Mester awor aki mes, fe sin fingimentu, den tur su grandura i plenitut.

---

Mensahe presentá dor di Sra. Sarepta Myrenda Irish Henry, mihó konosí den Iglesia Atventista di Shete Dia komo fundador di Ministerio pa Hende Muhé Atventista.

# KON HASI IGLESIA



*Guia pa yuda Mayoranan*



**AGRADABEL PA  
FAMIANAN**

# N

O ku e tabata na punto di bira un Sabat di karchi kòrá. Pa bisti mi yu hòMBER di seis aña i e yu muhé di dos aña den nan paña di sabat i logra pone nan den outu ya kaba tabata un lucha titániko. I tuma nan for di Sabat Skol pa bai kulto divino tabata un otro. Stephen tabata interesá pa usa su revista Amigu di Muchanan komo spada den un guera imaginario, i Juliane a bai stret na e balkon ariba i a hinka su kabes meimei di e tralinan i a yega hopi serka di tira su mes for di haltura manera un zwan pa e flur ayabou.

Durante kulto divino e muchanan tabata inkieta i ta hasi boroto. Ora e pastor—mi kasá—a kuminsá ku su sermon riba e buki di Daniel, mi tabata hopi kansá. Ta kon mi mama a logra tene mi ketu den misa? Ah! Awor mi ta kòrda ku un tiki envidia, mama no mester a hasié. Mama tabata kanta den koro i un otro hende tabata kuida pa mi (i probablemente tabata tene mi ketu). E markanan di pia di e mainta ei tabata kla visibel den mi bista segun nos a baha for di e balkon i mi a guia mi tou chikí pa ofisina di mi esposo. Mi por a sera mi wowonan i skucha e sermon for di e spiker, miéntras ku Stephen i Juliane tabata hunga trankil bou di banki ku nan koí hunga pa iglesia.

Un par di minüt despues mi a habri wowo wak Juliane ku a subi riba mi skochi. Tabatin un sker den su mihó shimis di sabat: “esun ku mi tabatin kologá un aña den kashi pa lag’é krese un poko pa e sirbié bon.” Mi a kuminsá bisa, “Julie, kon esei a sosodé?” ora ku mi a mira un otro sker, i un otro i un otro. Anto despues mi a mira e skèr di lèsenar riba flur. “Julie” mi a grita.

Ei a kuminsá yora, i mi a kuminsá sinti horibel ora mi a pusha e i su ruman dor di porta segun nos tabata bai direkshon di outu. Dos miembro di iglesia a mira segun nos tabata sali bai tur zonzá. “Ta di kon mi tin ku bai misa? Mi tabata grita den mi mes. E ta demasiado duru! Pa e último seis añanan mi no a konosé kiko ta nifiká un Sabat di Deskanso!”

## Èxodo despues di Sabat Skol

Pero no tur Sabat ta dje malu, òf lo mi a pèrdè mi religion basta tempu pasá! Pero pa bai iglesia ta un berdadero kansansio. Mi yunan ta chikí, aktivo, i sosiabel. I nan no por lesa ainda. Mi ta bini kada sirbishi di misa ku un meskla di plaser i teror.

Aparentemente, mi no ta mi so den esaki. Hopi otro famianan ya no ta hasi esfuerso pa bai iglesia mas. Djis para na porta ora ku Sabat Skol kaba i wak kuantu ta bai kas for di einan.

## Muchanan ta bon biní?

**Di bèrdat nos ke kore ku muchanan  
i nan mayornan for di iglesia?  
Esei lo por hasi sirbishinan di adorashon  
hopi mas ketu i mas reverente.  
Pero e lo hòrta nos for di nos futuro  
i ta destruí e vitalidat spiritual  
di mayornan awendia,  
ora ku di bèrdat nan tin mester di dje.**

Despues di 6-aña komo mayor, mi ta konvensí ku nos mester hasi nos misanan mas agradabel pa famianan yòn. E no ta sufisiente pa sakudí kabes i bisa ku “mayornan di awendia no tin idea kon pa disipliná nan yunan, manera nos.” Nos tin ku rekonosé ku mayoria ta hasi mas mihó ku nan por.

Beibinan, despues di tur kos, ta beibi. Manera James Dobson a bisa kontestando un mama su pregunta: “mayoria di mucha di 2-aña no por dobla su mannan chikí i sinta ketu den misa, meskos ku nan no por landa krusa Oseano Atlántiko. Nan ta bira, i ta agitá, i ta usa kada momentu ku nan ta lantá.”

E mama no mester kastigá su yu pasobra e no ta sinta ketu, Dobson a bisa. “Mester lag’é den ‘krèsh’ kaminda e por sakudí e fundeshi sin stroba e adoradónan” (The Strong-willed Child, p. 67).

Iglesianan den hopi denominashon ta ofresé “krèsh” i kuido speshal pa mucha na un base regular. Pero Atventistanan di Shete Dia tin un “kultura korporal” fuerte ku ta sostené ku muchanan mester ta paden den misa huntu ku nan mayornan. Poko iglesia Atventista tin kuido apart pa mucha. E nesidat aki por kore ku algun miembro i bishita potenshal. Algun amistadnan ku no ta Atventista, kustumbrá di risibí e atenshon aki for di nan iglesianan protestant nunca a bini pa tende mi esposo prediká pasobra nan no ke pasa dor di e lucha di ta den misa huntu ku nan yunan.



Kuantu otro famia yòn ku por a uni ku nos iglesia no ta hasi asina pasobra nos no ta ofresé kuido ku e muchanan ta rekerí?

Evangelistanan sabi esaki, i planiando nan kampaña, pa rutina nan ta inkluí un presupuesto pa kuido di muchanan. Muchanan por risibí un bendishon spiritual adaptá na nan edat, miéntras ku nan mayornan ta dediká nan mes na adorashon i estudio sin strobashon.

### Bira mas amikabel

Doug Murren, un pastor ku a mira su kongregashon krese for di un man yen di esnan ku ta asistí na kasi 4,000 den ún dékada so, ta bisa den su buki "The Baby Boomerang" ku "kualke iglesia ku invertí genuinamente den muchanan lo krese."

Mi ta kompartí e kreensia aki. Ata algun sugereñsia ku lo yuda hasi iglesia mas amikabel pa mucha i mayor.

**1.** Semper inkluí algu den servisio di adorashon ku ta rekonosé muchanan i laga nan sa ku nan ta bon bini. Hesus a hasi esei. El a pone e muchanan riba su pia, i posibelmente el a konta nan algun parabel ku ta pas pa nivel di nan komprondementu. Kisas algun di esnan registrá den e Evangelionan tabata nada otro ku historia pa mucha ku Hesus a konta ora El a invitá nan bin serka dje.

**2.** Proveé famianan yòn ku nan mes espasio. Asigná nan algun banki speshal i respetá nan. Si abo komo grandi mester di silensio absoluto pa adorá, skohe un asiento ku ta supli e nesesidat ei, na lugá di warda pa e muchanan duna bo e pas kompleto ei. (Generalmente bankinan dilanti tin poko mucha. Sinta einan).

**3.** Regularmente rekonosé e esfuerso heroiko ku mayornan yòn ta hasi pa trese nan muchanan misa. Un palabra kariñoso "*kon dushi ta pa mira muchanan i nan mayornan*", ta duna hende ánimo pa bini bèk, i sa ku un palabra di krittika por pone nan sali bai yorando pa nunca mas bolbe einan.

**4.** Si bo mira un mucha ku ta haña partikularmente difísil pa keda sinta ketu den misa, ofresé pa hiba e òf su mama na e kuarto di mamanan, òf kana un ratu kuné. Mayornan lo sinti hopi agradesido i siguramente bo ta sera un otro amistat.

**5.** Si bo no por sostené un krèsh òf un programa tur siman pa mucha, purba a lo ménos un biaha pa luna. E por funshoná dor di henter e sirbishi di adorashon òf a lo ménos durante e sermon. Nos iglesia ta hasié i ami ta wak ku anhelo padilanti pa e dia ku e lo hasi esei henter luna! Bo por usa algun materialnan di Fakansi Beibel Skol, dal un kaná den naturalesa, aktua algun personahe for di historia di Beibel, i — si no tin hopi hende pa yuda— mustra un video di Beibel. Tin algun bon material.

**6.** Repartí un boletin speshal pa mucha i inkluí algun aktividat pa esnan ku ta muchu yòn i no por lesa.

**7.** Konsiderá pone un "biblioteka di fia buki", di aktividatnan silensioso pa tene mucha chikí okupá durante e servisio: kosnan manera material di filt, bukinan pa klür, èts. Por laga nan bin registrá i fia promé ku kulto i debilbé esakinan despues di sirbishi. Esaki lo duna e muchanan algu speshal i nobo pa wak padilanti n'é durante siman. Kada mayor por kontribuí ku algu pa e biblioteka di fia buki.



### ALGUN LUGÁ PA HAÑA IDEANAN:

- \* [graphics silent books for kids in church - Bing images](#)
- \* [Felt Quiet Book - Bing images](#)

**8.** Konsiderá sigui ehèmpel di e Iglesia na Estes Park, Colorado, ku ta duna “pakete di bishita” pa muchanan ku bin misa.

**9.** Di bes en kuando organisá iglesia na airu liber kaminda famianan yòn por disfrutá di nan sirbishi di adorashon i estudio i kompañerismo sin tin nodi preokupá nan mes pa e komportashon perfekto di nan yunan.

**10.** Asigná un lugá speshal kaminda mayornan por laga bruki/ pampers, bòter limpi i weganan di iglesia durante siman.

### **Rekonosé ku muchanan tin personalidatnan pekuliar i ku nan no ta adultonan den miniatura.**

**11.** Algun por sinta ketu den misa i disfrutá di e servisio, miéntras ku pa otronan e ta kasi imposibel. Tene pasenshi! Segun tempu pasa muchanan ta krese i nos ke pa nan relashon ku iglesia ta positivo i agradabel.

**12.** No sera frenta! Laga mayornan i muchanan sa ku nan ta bon bini i stimá, no importa kon e muchanan komportá. Generalmente nos ta keda atraé na famianan kortes, ku bon manera, i ta evitá esnan difisil ku ta hasi boroto. Pero ta kua di nan mester mas tantu di nos amor i yudansa? Hesus no a bisa, “Laga e muchanan bin serka mi basta nan para ketu.” Mas bien El a instruí nos, “No stroba nan, pasobra e reino di shelu ta di nan.”

No tin nada mas presioso ku un sonrisa riba kara di un “heredero chikí di e reino.” Nos iglesianan i nos bida ta keda enrikesé dor di nos muchanan. Nan lo ta nos futuro, basta nos duna nan bon bini meimei di nos awe.



**SEÑOR, WAK NOS FAMIA BO DILANTI.**

**Nos ta gradisí bo pa e dak riba nos kabes;**

**Pa e afekto ku ta uni nos;**

**Pa e pas ku bo a duna nos awe**

**Pa e speransa ku nos ta warda mayan kuné;**

**Pa salú, sosten, i e shelu kla**

**Ku bo ta alegrá nos bida kuné;**

**Pa e amistadnan ku nos tin tur kaminda i**

**Pa esnan ku ta yuda nos den forma amikabel.**

**Yena nos mentalidat chikí ku pas, Señor.**

**Saka tur disgustu for di nos kurason.**

**Pone den nos bondat i fortaleza pa sufri i perseverá.**

**Mara bo grasia por move nos pa komprondé**

**I pordoná esnan ku a ofendé nos.**

**Yuda nos soportá ku kurashi e ingratitut di otronan.**

**Duna nos forsa, goso i pas di mente.**

**Mantené nos den afekto di e kurason amikabel;**

**Suavisá kurason di e enemigu.**

**Protehá nos den tur nos esfuerso di salú, si esei ta bo boluntat.**

**Si no ta asina, duna nos forsa pa asina ora bin sosodé**

**Loke ta destiná pa nos, laga nos tin kurashi den peliger,**

**Firmesa den tribulashon, dominio propio den rabia i prueba,**

**I asta te na portanan di morto,**

**Lealtat i afekto un pa otro.**

**Señor, pa e amor di Kristu nos ta roga pa bo miserikòrdia i yudansa.**

Roberto Luis Stevenson





HOME

The word 'HOME' is rendered in a playful, colorful font. The 'H' is a red house with a green door and a window with green and red panes. The 'O' is a bright yellow sun with rays. The 'M' is a green house with a red roof and a window. The 'E' is a green house with a red roof and a window. A green leafy branch is positioned between the 'H' and 'O', and a red flower with a yellow center is positioned above the 'M'.

SWEET

The word 'SWEET' is rendered in a colorful, patterned font. The 'S' is green with yellow and red stripes and yellow hearts. The 'W' is red with white hearts. The 'E' is yellow with a red and green floral pattern. The 'T' is green with red and yellow stripes. The 'E' is green with white hearts.

HOME

The word 'HOME' is rendered in a colorful, stylized font. The 'H' is a green house with a red roof and a window. The 'O' is a green house with a red roof and a window. The 'M' is a red house with a green roof and a window. The 'E' is a green house with a red roof and a window. A red wheel is positioned between the 'H' and 'O', and another red wheel is positioned between the 'M' and 'E'. A small sign with the word 'Home' is on the 'H'.